

**2019-mut Aningaasanut Inatsisissatut Siunnersuut**

(Aningaasaqarnermut Nunanilu Avannarlerni suleqatigiinnermut Naalakkersuisoq)

**Akissuteqaat**

(Aningaasaqarnermut Nunanilu Avannarlerni suleqatigiinnermut Naalakkersuisoq)

**Aappassaaneerinnineq****Aallaqqaasiut**

Aallaqqaammut Aningaasaqarnermut Akileraartarnermullu Ataatsimiititaliaq 2018-imut aningaasanut inatsisissatut siunnersuummik, Naalakkersuisullu aappassaaneerinninnermut atatillugu allannguutissatut siunnersuutaannik sukumiisumik suliarinnissimaneramik Naalakkersuisut sinnerlugit qutsavigissavara.

**Aappassaaneerinninnermi allannguutissatut siunnersuut**

Aappassaaneerinninnissamut Naalakkersuisut katillugit aningaasaliissutinut allannguutissatut siunnersuutit 66-it, oqaasertaliussanullu allannguutissatut siunnersuutit 18-it saqqummiuppaat. Allannguutissatut siunnersuutit IST-p (Ingerlatsineq Sanaartorneq Taarsigassarsititsineq) inernissaatut missingersuutigineqartup 2019-imi 17,3 mio. kr.-nik piffissamilu ataatsimut aningaasanut inatsisiliorfiusumi 2019-2022 23,5 mio. kr.-nik ajorseriarneramik nassataqassapput.

Kommuninut 2019-mut ataatsimoortumik isumaqatigiissuteqarneq tunngavigalugu kommuninut ataatsimoortumik tapiissutissanut aningaasaliissutinut allannguutissatut siunnersuummik saqqummiussisoqarpoq. Isumaqatigiissut allannguutissatut siunnersuutillu Aningaasaqarnermut Akileraartarnermullu Ataatsimiititaliamut nassiuuneqarput.

Ilinniartunut inissialiornermut atatillugu Qaqortumi, Nuummi, Sisimiuni, Aasianni Ilulissanilu ilinniartut ineqarfiinik sanaartornissanut pilersaarusionermit 35,8 mio. kr.-t atugassanngortinneqarnissaat qinnutigineqarpoq. Illoqarfinni tallimani pilersaarusionermit ilinniartut ineqarfiinik sanaartornerit katillugit 464-inik ineqarfigineqarsinnaasut ilaapput. Ilinniartut ineqarfiinik sanaartugassat siulliit 2019-imi tamanut suliariumannittussarsiuunneqarnissaat naatsorsuutigineqarpoq.

Peqqinnissaqarfimmi sulisunik nutaamik isumaqatigiissuteqarnermi aningaasarsianut aningaasartuutit annerunerulernerisa malitsigisaanik peqqinnissaqarfimmut ukiumut aningaasaliissutit 12,9 mio. kr.-nik ilaneqarnissaat qinnutigineqarpoq. Aningaasat isumaqatigiissuteqarnermut sillimmatinit nuunneqassapput.

Isertitassatut inatsisillu naapertorlugit aningaasaliissutinut allannguutissatut siunnersuutit pingasut saqqummiunneqarput. Allannguutissatut siunnersuutit piffissaq aningaasanut

inatsiseqarfiusuni 2019-mit 2022-mut IST-mik angusassatut missingersuutinik 10,5 mio. kr.-nik ajornerulersitsissapput. 2019-imi EU-mik suleqatigiinnissamik isumaqatigiisummi aningaasanut inatsisissatut siunnersuummi tunngavigineqaqqaartumit 2019-imi 15,6 mio. kr.-nik isertitakinnerunissap nassatarisaanik pivoq. Tamanna EU-p 2019-imi 2021-2027 isumaqatigiisutigisinnaasap piareersaasiorneranut atatillugu suliniutinut missingersuutaareersunut aningasaliinera tunngavigalugu pivoq.

Kalaallit Nunaata nunataata qatsissusaanik satelliti atorlugu nunamik assiliornissamut Kalaallit Nunatta 2019-mi tapiissutissaatut 2 mio. kr.-t immikkoortinneqarnissaat qinnutigineqarpoq. Suliniummi nunap sermimik qallersimannngitsup tamarmi assiliornissaa suliniutaavoq. Suliniut tamarmi katillugit 60 mio. kr.-nik akeqassaaq, ilaatigullu Sakkutooqarfimmit kiisalu A.P. Møller og Hustru Chastine Mc-Kinney Møllers Fond til almene Formaal tapiiffigineqarluni aningaasalersorneqassaaq. Periarfissaq iluatsillugu aningaasaateqarfiup suliami matumani akuunera Naalakkersuisut qujassuteqarfiumavaat.

September 2018-imi nutaanik naalakkersuisunnngortitsineq tunuliaqutaralugu allannguutissatut siunnersuutit arlallit saqqummiunneqarput, taamaaliornikkullu oqartussaaffiit nutaamik agguarneqarneri aningaasanut inatsisissatut siunnersuummut inississorneqarnissaat qinnutigineqarluni. Allannguutissatut siunnersuutit IST-p inerneranut missingersuutigineqartumut sunniuteqassanngillat.

Oqaasertaliussanut siunnersuutinik arlalinnut saqqummiussisoqarpoq, taakkulu teknikimut oqaatsillu atorneqarnerinut tunnganerupput. Oqaasertaliussanulli siunnersuummik Royal Arctic Line A/S-p qullersaqarfigisimasaata Nunatta karsianut akileraarutitigut isertitsissutaanngitsumik atugassannngortinneqarsinnaaneranik qulakkeerinnittumik suliaqartoqarnera immikkut oqaatigineqassaaq. Taamaalilluni illup Nuummi talittarfitoqqamiittup Nuummi tikeraaraat ornittagassaattut atugassannngortinneranut ikorfartuutaassaaq. Massakkut pinngortitaq nunallu sananeqaataanut tunngasut qulequtaralugit sulisoqarpoq.

### **Aningaasaqarnermut Akileraartarnermullu Ataatsimiititaliap aappassaaneerinninnissamut isumaliutissiissutaa**

Aningaasaqarnermut Akileraartarnermullu Ataatsimiititaliap aappassaaneerinninnissamut isumaliutissiisummini Naalakkersuisut allannguutissatut siunnersuutit saqqummiussaasa tamarmik akuerissutigineqarnissaat inassutigaa. Aningaasaqarnermut Akileraartarnermullu Ataatsimiititaliap allannguutissatut siunnersuutit saqqummiunneqartunik akuersaartumik suliarinninnera Naalakkersuisut qujassutigaat.

### **Pingajussaaneerinninnissamut allannguutissatut siunnersuutissatut naatsorsuutigineqartut**

Akileraarutinut akitsuutinullu missingiutit nutaat malitsigisaanik kiisalu aningaasanut inatsisissatut siunnersuut pillugu partiinik isumaqatiginninniarnit inernerisa malitsigisaannik pingajussaaneerinninnissamut allannguutissatut siunnersuummik saqqummiussisoqarnissaa naatsorsuutigineqarsinnaavoq.

Tamatumalu sanitigut ukiuni aningaasanut inatsiseqarfiusuni 2019-init 2022-mut isertitat aningaasartuutillu oqimaaqatigiinnerinik qulakkeerinnittussanik allannguutissatut siunnersuummik saqqummiussisoqarsinnaanera naatsorsuutigineqarsinnaavoq. 2019-imut

aningaasanut inatsisip akuersissutigineqarnerani isertitat aningaasartuutillu oqimaaqatigiinnissaat Naalakkersuisut pingaartippaat.

### **Naggasiut**

Naggasiullugu Naalakkersuisut sinnerlugit partiit tamaasa 2019-imut aningaasanut inatsisissatut siunnersuut pillugu politikikkut isumaqatiginninniarnerni isumalluartumik siunnerfilimmillu suleqataasimanerannik qutsavigiumavakka. Pingajussaaneerinninnissaq sioqqullugu Naalakkersuisut 2019-imut aningaasanut inatsit pillugu isumaqatigiisummik saqqummiussinerannik inerreqassasoq naatsorsuutigineqarpoq. Taamaalillunilu 2019-imut aningaasanut inatsit amerlanerussuteqarluartunik tunuliaqutserneqassasoq Naalakkersuisut neriuutigaat.

Taama oqaaseqarlunga pitsaasumik pissarsiffiulluartumillu aningaasanut inatsit pillugu oqallinnissaq qilanaarigakku oqaatigissavara.